



Indgået

6 JUNI 2018

NAMMINERSORLUTIK OQARTUSSAT  
GRØNLANDS SELVSTYRE  
INATSISARTUT ALLATTOQARFIAT  
BUREAU FOR INATSISARTUT  
Box 1060 - 3900 Nuuk

Inatsisartunut ilaasortaq  
Jens Napätôk', Partii Naleraq  
/Maani

## Ikuallaaviit pillugit § 37 naapertorlugu apeqquteqaammut nr. 85-imut akissuteqaat

Asasara Jens Napätôk'

Ulloq 23. maj 2018 Naalakkersuisunut ikuallaaviit pillugit apeqquteqarputit. Apeqqutit uannut akisassanngorlugit innersuunneqarput.

### 1. Siunissaq qaninnerusiq aammalu siunissaq ungasinnerusiq eqqarsaatigalugu eqqaavinnik ikuallaavinnik illoqarfinni sumi sanaartortoqarnissaanik pilersaaruteqartoqarpa?

#### Akissut:

Naalakkersuisut ilaatigut eqqagassalerinermi sanaartugassanut pilersaarut, eqqagassalerinermi sanaartukkanut aningaasaliinissamut tunngasoq suliarisimavaat. Kisiannili kommunalbestyrelsit illoqarfinni nunaqarfinnilu tamani eqqakkanut piaaviusinnaasunik pilersitsinissamut qulakkeerinissaq isumagisassaraa, taakkunungalu illoqarfinni nunaqarfinnilu sanaartugassanut aserfallatsaaliuinissamullu siunissamut qanittumut siunissamullu ungasissumut pilersaarusiornissaq ilaavoq. Ikuallaaviliortarneq aningaasaliiffigissallugu oqimaatsuvoq. Tamanna tunngavigalugu aningaasanut inatsimmi kommunini eqqakkanik ikuallaaviliornissamut tapiissuteqarnissamut periarfissiisoqarpoq.

Kommuneqarfik Sermersooq, Qeqqata Kommunia aamma Kommune Kujalleq kommunini eqqagassanut pilersaarusiatic naammassereerpaat. Avannaata Kommunia aamma Kommune Qeqertalik eqqagassanut pilersaarusiortutik ingerlapput. Kommunit illoqarfinni nunaqarfinnilu eqqagassalerinermik pitsaanerusumik pilersitsinissaat anguniarlugu pilersaarutit taakku ineriartortinnerinut Naalakkersuisut aningaasanik tapiissuteqarput. Aamma Naalakkersuisut illoqarfiit annerit arfinillit ikuallaaviisa qanoq issusiinik nalunaarusiornissamut aningaasanik tapiissuteqarput.

Misissueqqissaarnerit tikkuarpaat, nunatsinni eqqagassalerinermut aaqqiissutissat qitiusumut inissineqarnissaasa tungaanut nikikkiartuaarnissaq, avatangiisinut inuiaqatigiinnullu aningaasaqarnikkut aaqqiissutissani pitsaanerpaasoq. Taamaattumik qitiusumi ikuallaavinnik nunarput tamakkerlugu eqqagassannik passusiviusinnaasunik ataatsimik arlalinnilluunniit pilersitsinissaq periarfissaqarnersoq, Naalakkersuisut kommunit peqatigalugit misissuleruttorpaat. Misissueqqissaarnerni ilaatigut ikuallaavimmik qitiusumik ataatsimik amerlanerusunilluunniit sumut inissiinissaq iluaqutaanerpaassanersoq

Allakkap ullua: 05-06-2018  
Sulialq nr.: 2018 - 11501  
Akt-id: 7950187

Postboks 1614  
3900 Nuuk  
Tlf. (+299) 34 50 00  
Fax (+299) 34 54 10  
E-mail: pan@nanoq.gl  
www.naalakkersuisut.gl

paasiniarneqassaaq. Ikuallaavinni anginerusuni putsumik pitsaannerusumik saliinissaq qulakkeerneqarsinnaavoq, taamatullu nukissiap eqqakkanit pilersinneqarsinnaasup pitsaannerusumik atorluarneqarnissaa qulakkeerneqarsinnaalluni. Eqqakkat isumaqanngitsutut, aningaasaqarnikkut pitsaanerpaamik piiarneqartussatut isigineqaannaratik isumalluutitut, nukissiornermi atorneqarsinnaasutut isigineqartariaqarnerat tamanit isumaqatigineqarpoq.

## **2. Inuit peqqissusaat aammalu avatangiisit innarlinnginnissaat eqqarsaatigalugu qanoq Naalakkersuisut tamatumunnga iliuusissamik pilersaaruteqarpat?**

### Akissut:

Avatangiisinut tunngatillugu Naalakkersuisut mingutsitsinissamut naleqquttumik illersuinissamik qulakkeerinissaq anguniagaraat. Taamaattumik Naalakkersuisut ilaatigut avatangiisinut aningaasaateqarfimmik pilersitsinissaq suliaaraat. Avatangiisinut aningaasaateqarfik avatangiisinut suliassaqaarfimmut aningaasalersuisarnermik allanngortitsinikkut inuiaqatigiit nungusaataanngitsumik ineriartortinneqarnissaannut nukittortitsissaaq. Avatangiisinut suliassaqaarfik tassaassaaq sunniiniut nutaaq, avatangiisinik suliassaqaarfimmi akitsuutinit isertitanik katersuiffiusinnaasoq, aammalu taamaalilluni avatangiisit pitsaasuunissaannut peqqinnartuunissaannullu qulakkeereqataaffiusinnaasoq. Avatangiisinut akitsuutinit isertitat Avatangiisinut Aningaasaateqarfimmut ikineqartarnissaat, aammalu avatangiisini pitsanngorsaannut atorneqartarnissaat eqqarsaataavoq. Taamaalilluni avatangiisinut akitsuutit avatangiisinik pitsanngorsaannut atorneqartarnerat innuttaasunut suliffeqarfinnullu ersarississaaq. Tassalu Avatangiisinut Aningaasaateqarfik avatangiisinut suliassaqaarfimmi siunissamut ungasissumut aaqqiissutissanik atasinnaasunillu pilersitseqataassaaq. Tamatuma peqatigisaanik avatangiisinut akitsuutit atuisut avatangiisinut mingutsitsinnginnerusumik pissusilersortarnissaannut kajumissaataassapput.

Tamatuma saniatigut avatangiisinik illersuinissamut tapiissuteqarnissamut periarfissat allat, aningaasanut inatsimmi allassimasut, kiisalu avatangiisinik pinngortitamillu innarlitsaaliuinnermut inatsisit atuuttut innersuussutigissavakka.

Isumaga malillugu avatangiisinik pinngortitamillu innarlitsaaliuinnissamut inatsisigut naleqquttorujussuupput, aammalu Naalakkersuisut kommunillu avatangiisinut pinngortitamullu qulakkeeriniarlutik suliaannut tungavissaalluarlutik.

Inussiarnersumik inuulluaqqusillunga



Kim Kielsen